

劉中丞奏議



劉中丞奏議卷十三目錄

軍營捐輸餉銀請廣學額疏

附加各原

籍學額清單

查覆已革知府在任款蹟疏

附道府會稟歧異分案審理疏

附報籌撥甘軍餉銀軍火數目疏

保奏克復吳旂鎮出力員弁疏

附請將漢郡殉難州縣建祠

旌獎疏

甘回竄擾平涇分路追剿疏

附密陳叛將情形暫行監禁疏

附遵查武關並未撤防疏


劉中丞奏議卷十三目錄

查明張集馨被參各款據實覆奏疏

附查覆陸塋稟許龍常各情疏

陝西各路墾荒事宜疏

附遵 旨稍緩起程疏



劉中丞奏議卷十三

湘鄉劉 蓉著

軍營捐輸餉銀請廣學額疏

同治四年九月二十五日

奏為軍營官兵捐輸餉銀援例懇

恩加廣學額並請開復處分其陣亡員弁勇丁請於死事地方

自立總祠以昭激勸而慰忠魂恭摺仰祈

聖鑒事竊查前帶湖南果健營道銜陝西候補知府易佩紳會

同前任四川隆昌縣知縣羅亨奎各在原籍湖南龍陽等縣及

江西武甯縣招募勇丁四千三百名由楚入川隨同已革陝西

布政使毛震壽赴援漢南於同治元年八月十一日抵陝二年

劉中丞奏議卷十三

九月二十九日遣撤共計欠發餉項墊辦軍裝及養傷等銀二

十一萬三百四十七兩因陝庫支絀異常無款可籌迄今未能

補發茲據毛震壽稟稱易佩紳等念切時艱情殷報効請將前

項欠餉悉數捐輸並請將陣亡弁勇在於城固縣地方自行建

立總祠川楚各軍殉難官兵一體附祀以慰幽魂等情當經札

飭軍需局司道會議去後茲據詳稱竊查前奉部文各省捐餉

紳士除給予本身獎敘外凡一州縣捐銀一萬兩者准廣文武

學定額各一名二千兩者准廣一次文武學額各一名一省捐

銀十萬兩准廣鄉試文武中額各一名等因又准戶部議覆御

史官亮奏軍需項內欠發墊發各款應否補造報銷案內聲明

欠發兵勇口糧現據江甯將軍富明阿廣西提督馮子材先後條奏或請給發餉項准照實銀請獎或請作為捐款加廣原籍中額均屬深明大義踴躍急公惟各省情形不同欠發之餉亦多寡不一應如何設法清釐之處應請

敕下各路統兵大臣及各直省督撫體察情形迅速奏報俟奏報到日再由臣部酌核辦理等因通行遵照各在案今果健營易佩紳等所部弁勇請將欠餉等銀二十一萬三百四十七兩作為捐輸洵屬急公好義自應照例加廣各原籍文武學額以昭激勸等情具詳請奏前來臣覆查無異除咨湖南江西各撫臣查照作為該省士民在陝捐助軍餉彙入本省加廣學額中

劉中丞奏議卷十三

額案內辦理外謹分繕具清單恭呈

御覽伏懇

飭部迅賜核覆至該營援陝以來屢立戰功先後陣亡員弁勇丁七百餘名均屬沒於王事情殊可憫合無仰懇

天恩俯准在於陝省城固縣地方自立總祠凡川楚各軍殉難官兵准其一體附祀以慰忠魂至道銜候補知府易佩紳前於漢南失利案內奉

旨革職留營効力今所部果健營應領餉項數逾二十萬兩悉數捐輸雖屬各弁勇情殷報効實由該革員平日甘苦與共恩信相孚且該員墊製軍裝及墊發養傷共銀二萬二千七百餘

兩一律報捐尤爲難得可否准予開復革職處分之處出自
逾格恩施其各營應領卹賞銀兩現在餉項支絀無款可籌應
俟庫款稍裕再由軍需局核明籌撥所有果健營員弁勇丁捐
助軍餉援例加廣學額並請開復處分其陣亡官兵准其自立
總祠各緣由理合恭摺具奏伏祈

皇太后

皇上聖鑒訓示飭遵謹

奏

謹將果健營捐助軍餉請加各原籍學額數目繕具清單恭呈
御覽

計開

劉中丞奏議卷十三

三

革職留營知府易佩紳捐墊發軍裝養傷銀二萬二千七百八
十八兩請加廣本籍龍陽縣一次文武學額各十一名

湖南龍陽縣弁勇捐銀五萬二百兩請加廣龍陽縣永遠文武
學額各五名

長沙縣弁勇捐銀一萬四千五十兩請加廣長沙縣一次文武
學額各七名

善化縣弁勇捐銀一萬四千五十兩請加廣善化縣一次文武
學額各七名

甯鄉縣弁勇捐銀一萬二千一百兩請加廣甯鄉縣一次文武

學額各六名

澱浦縣弁勇捐銀一萬二百兩請加廣澱浦縣一次文武學額各五名

保靖縣弁勇捐銀一萬二百兩請加廣保靖縣一次文武學額各五名

龍山縣弁勇捐銀一萬一百兩請加廣龍山縣一次文武學額各五名

湘潭縣弁勇捐銀六千五百兩請加廣湘潭縣一次文武學額各三名

湘陰縣弁勇捐銀六千五百兩請加廣湘陰縣一次文武學額各三名

劉中丞奏議卷十三

四

益陽縣弁勇捐銀六千五百兩請加廣益陽縣一次文武學額各三名

武陵縣弁勇捐銀六千五百兩請加廣武陵縣一次文武學額各三名

澧州弁勇捐銀四千五百兩請加廣澧州一次文武學額各二名

慈利縣弁勇捐銀四千五百兩請加廣慈利縣一次文武學額各二名

永定縣弁勇捐銀四千五百兩請加廣永定縣一次文武學額

各二名

瀏陽縣弁勇捐銀二千五十兩請加廣瀏陽縣一次文武學額各一名

桃源縣弁勇捐銀二千四十兩請加廣桃源縣一次文武學額各一名

沅江縣弁勇捐銀二千六十兩請加廣沅江縣一次文武學額各一名

沅陵縣弁勇捐銀二千一百兩請加廣沅陵縣一次文武學額各一名

永順縣弁勇捐銀二千五十九兩請加廣永順縣一次文武學額

劉中丞奏議卷十三

五

額各一名

以上湖南省共捐銀十九萬三百四十七兩應請以銀十萬兩加廣湖南鄉試文武中額各一名餘銀九萬三百四十七兩歸入湖南各次捐輸案內核辦

江西武甯縣弁勇捐銀二萬兩請加廣武甯縣一次文武學額各十名

查覆已革知府在任款蹟疏

同治四年九月二十五日

奏爲查明已革知府在任款蹟恭摺覆奏仰祈

聖鑒事竊照前任榆林府知府劉廷鑑貪利營私行多詭詐經臣訪查據實甄別奏參並聲明在任抽收釐稅徵多報少且有

借端科罰民財入私肥已等事欽奉

諭旨先行革職聽候查辦等因欽此嗣經西安將軍署督

臣都

興阿奏調該員赴營差遣又經

臣附

奏暫留榆林面質案情虛實奉

旨允准在案嗣飭催署延榆綏道李義鈞署榆林府知府齊琮
會同查明稟覆批司會核妥擬去後茲據藩司林壽圖署臬司
官銘議詳請奏前來

臣

隨就李義鈞齊琮查稟各層逐加覆核

緣榆林額設落地稅向由知府經收商賈按照稅則交錢解時
易銀每起掣給稅票一張收錢一文名爲小票費歷久相沿該
革員尙係照舊辦理惟咸豐九年奉文抽收土釐歸府經理除

劉中丞奏議卷十三

六

照卡則抽收釐錢外每土一兩亦收票錢一文名爲大票費此
項土貨俱係零星小販每起不過數兩至十餘兩不等核計所
收大小票錢僅敷紙張之用至咸豐十年奉文截擋土貨補徵
甯條梁稅課每百斤收稅錢四十文同治二年改爲每百斤
收稅銀二十三兩並經前署延榆綏道何丙勳稟准每百斤提
耗銀一兩以充經費乃該革員並不遵照新章收銀仍舊收錢
掣給客商交銀稅票並有票錢名目顯係從中乘除侵蝕訊據
管稅家丁曹升稅書王聘三等僉供釐稅先係收錢同治二年
奉到新章改爲每百斤收正耗稅銀二十三兩有甘肅客商陳
敬禮販土過境投稅本官諭令婉勸該商以錢核算稅銀二十

三兩每兩作錢一千七百文合錢三十九千一百文另出火耗
解費錢九百文連每兩交票錢一文每百斤共交錢四十一千
六百文該商應允交納隨後又有客商豐盛魁等三起過境亦
卽查照完稅計土稅四起共餘銀六百餘兩質之該革員親供
均屬相符並稱因奉藩司飭將延鎮存兵不足軍械及征兵需
用軍物概由地方文武勸捐製造是以勸令土商以銀合錢並
出火耗解費票錢當時祇圖捐貲製械有益防剿銀已交營並
無侵蝕人已情弊隨移准延綏鎮中營覆稱三年十二月十七
日劉廷鑑送交該營銀六百二十二兩七錢四分一釐業已製
成擡礮二位擡鎗四十桿烏鎗二百桿腰刀二百把其餘正在

劉中丞奏議卷十三

七

趕造委員點驗屬實第事前並未報明而陳敬禮土貨一起最
爲大宗事在三年二月遲至年底始同後三起移銀作捐難保
非慮及浮收敗露爲此脫卸之計况勸捐製造軍械原因回氛
逼近防守起見自應明白曉諭使其樂從又何必託名解費巧
取且復多收票費並以銀折錢以錢合銀種種掙剝實屬鄙詐
不堪又查永濟橋工一款係該革員倡同官民捐貲交紳士督
工修理府署並未經手銀錢惟聞該革員有擅發充公之事訊
據總理工程紳士賀鴻運供稱咸豐十年四月紳民因城外大
河西靠沙梁水勢散漫淤沙壅墊日高逼水東移浸損民舍田
地推求其故由於下流永濟橋匯出之水地高河曲不能暢流

以致沙壅受患公懇擇地另建新橋稟蒙劉本府倡捐錢五百千文派該紳與舉人楊墀春總理帳項監工計開山鑿石長一百二十餘丈寬六丈深四丈有奇上建新橋一座於同治二年六月工竣共收官兵捐錢六千一串一百九十文內有府差張宗智罰錢二百千文共用六千五十八串五百三十文計不敷錢五十七串四百二十一文由該紳等捐墊等語並據該革員親供張宗智向充府差同治元年派令隨同前革榆林縣知縣楊廷翰查拏聚眾滋事之趙介退惹不前犯未弋獲發縣懲究該差情願罰捐錢二百串文自行送交紳士以濟工用因其所患僅祇緝捕不力准予從寬發落當卽親往查看近橋數丈河

劉中丞奏議卷十三

八

流尙爲峻駛其上流處所壅沙漲漫仍復未免是以不貲之費擲之無用之地已屬不知緩急且復違例科罰咎尤難辭又查兵米浮收剋減一款向係徵糧一石除收耗糧三升外加一五入倉以備霉變鼠折嗣於同治元年花戶人等公稟求減該革員曾於一五耗內減去三升勑石倉前歷年俱照減數徵收出入一律平肩現在盤無虧短以上各款既經李義鈞等查訊確切覆由兩司核議應卽擬結此案已革榆林府知府劉廷鑑在任經管倉糧尙無不合惟於府差張宗智緝捕要犯不力並無從嚴究懲率聽出錢修工含混完結已屬違例科罰至抽收釐稅溯查當日改定新章每百斤收銀二十三兩原以三兩作爲

耗羨留備各項之用該革員既不遵辦輒以銀作錢以錢合銀並巧立火耗解費票錢名目計土稅四起卽多收銀六百餘兩如因捐製鎮營軍械何以稽遲日久始行移營支用顯係多收少報物議沸騰恐至查出曲爲彌縫知府責任表率似此種種營私詭詐實乖職守惟浮收卒歸公用尙無人己情弊業經革職請免再議應否飭令前赴都興阿軍營聽候差遣恭候欽定除供咨部外所有查明已革知府在任款蹟緣由理合據實恭摺覆奏伏祈

皇太后

皇上聖鑒訓示飭遵謹

劉中丞奏議卷十三

九

奏

附道府會稟歧異分案審理疏

再臣前摺正繕就時接據卸署榆林府候補知府齊琮稟稱革員劉廷鑑徵收土稅曾經訊問府書康鉞供係照依前署延榆綏道何丙勳等所辦該府與李義鈞意見不合礙難會稟等情臣查該道府等前稱何丙勳與已革榆林縣楊廷翰收過土稅雖據府書康鉞供出惟事由道縣承辦康鉞並非經手之人所供難據爲定未便因此案外餘情將查辦正案延閣等情附稟再尋確據另辦尙未覆到今齊琮又以何丙勳創始浮收正此案之根源非案外之餘情具稟伏思道員李義鈞派與齊琮會

查事件自應認真案款覈實何致案甫稟覆卽生歧異齊琮前
既會銜會印合詞會稟因何忽稱意見不合是否前稟專由李
羲鈞主政抑或彼此實已商明另辦隨批藩臬兩司集證研鞫
而劉廷鑑亦卽以所遞親供漏敘此層稟訴其餘各款均未提
及自應先行擬結除將徵收土稅究竟始於何時飭司秉公徹
底確訊詳由新任撫臣趙長齡核辦外所有現在分案審理緣
由謹附片陳明伏乞

聖鑒訓示飭遵謹

奏

附報籌撥甘軍餉銀軍火數目疏

劉中丞奏議卷十三

十

再臣疊奉

諭旨籌撥甘肅軍需雖值窘乏萬分不敢稍存膜視業將同治
四年七月分撥解過援甘各營餉銀軍火數目附

奏在案茲據軍需局司道詳開同治四年八月分共解支過援
甘各營餉銀二萬一千五百兩白布單大帳房一百架火藥六
千斤鉛丸五千斤火繩八千丈均經分別委解給領取有迴文
爲據臣覆查無異除仍飭該司道等竭力籌措源源接濟外所
有陝省同治四年八月分解支過援甘各營餉銀軍火等項數
目謹繕清單恭呈

御覽理合附片陳明伏祈

聖鑒謹

奏

保奏克復吳旂鎮出力員弁疏

同治四年十月初一日

奏為查明克復吳旂鎮擒斬逆酋並疊次攻剿定邊竄回獲勝
在事出力員弁遵

旨擇尤保獎恭摺仰祈

聖鑒事竊臣頃奉同治四年八月二十六日

上諭劉蓉奏克復吳旂鎮擒斬逆酋惠喜中並疊次攻剿定邊
竄回獲勝各等語此次陝西防軍鄆太愚等攻剿向為得手著
劉蓉仍飭該將領等妥為防範毋稍鬆懈出力員弁准其擇尤

劉中丞奏議卷十三

十一

保獎等因欽此遵即轉飭鎮西軍同知鄆太愚義字營副將段
登雲率部認真防堵並與甘省慶陽防兵聯絡聲勢以固藩籬
茲據該將領等擇尤開單請獎前來臣覆加查核該將領員弁
攻剿堵禦閱時既久疊挫兇鋒自應量予獎敘以昭激勸謹繕

清單恭呈

御覽仰懇

天恩俯准給獎以示鼓勵除將干把以下各弁照例咨部辦理
外所有遵保鎮西義字兩軍出力員弁請獎緣由理合恭摺具

奏伏祈

皇太后

皇上聖鑒訓示謹

奏

附請將漢郡殉難州縣建祠 旌獎疏

再查上年漢中府屬州縣遭滇髮諸逆竄擾之害文武官弁死
事者多而最著者莫如署南鄭縣知縣周蕃壽西鄉縣知縣巴
彥善甯羌州知州金玉麟至今子遺士庶猶能稱頌而歌思之
周蕃壽當城圍已急先於署後穿鑿一井城破之日盡驅其妻
妾子女投入井中而自具冠服出坐堂皇爲賊劔腸決脰以死
巴彥善當藍逆倉卒竄犯之際慷慨登陴率吏民死守孤城歷
八晝夜援絕力竭城陷被執大罵不屈而死金玉麟自牧甯羌

劉中丞奏議卷十三

十一

循聲卓著城破身殞志節凜然死後賊得尸特爲具棺以殮且
張僞檄於櫬上大書此係陝西好官該士民應將其靈柩好爲
照護妥送回籍可見秉彝好德之良雖逆匪亦有未盡泯滅之
處臣以該三員臨難無苟免之心則平日修己立身與所以居
官行政亦必有異於俗吏之爲者當檄飭漢中道府採訪該三
員平生實蹟期爲譔集而表章之迄今逾年未據詳覆而臣且
夕卸篆未便聽其湮沒竊維軍興以來地方官嬰城罹禍以歸
忠義之林者何可勝道然或志矢堅貞或事由邂逅等爲一死
而道固殊焉該三員志節皎然非特予表揚無以別忠貞而激
頑懦伏乞

天恩特賜褒異

敕就漢中府城修建三烈總祠俾該三員合祠以旌素志而勵臣節實於世教有裨愚昧之見是否有當伏祈

皇上聖鑒訓示謹

奏

甘回竄擾平涇分路追勦疏

同治四年十月十三日

奏爲甘省逆回竄擾平涇搶劫糧餉經駐涇官軍分路追勦情

形恭摺據稟馳奏仰祈

聖鑒事竊

臣

於月前曾將官軍堵勦逆回獲勝涇長一帶防務

稍鬆情形奏報在案嗣據記名提督周顯承稟稱駐紮平涼各

劉中丞奏議卷十三

十三

營前經該提督稟請雷正綰飭派總兵沈大興統籌辦理其李

高啟雷恆所帶馬步各隊亦經併請交替接統免致擄掠村莊

敗壞營規並由該提督每月運解麩八千斤或六七千斤不等

源源滾運以資接濟一面酌派馬隊分赴涇州西南北三路鄉

村撻殺各處潰勇以免騷擾連旬以來稍覺安謐詎意九月二

十日逆回孫老五赫明堂馬雲和等帶領馬隊十餘名馳抵平

涼四十里鋪聲言迎接雷正綰前赴固原隨至馬良鎮與雷恆

李高啟等一處駐紮不知商議何事二十二日該提督委員帶

馬勇二十名護解餉銀一萬二千兩前赴雷正綰行營不意行

抵二十里鋪突遇逆匪竄來將所解餉銀悉數搶去護解員弁

僅止逃回馬勇九名其餘十一名及委員均不知生死下落並將所解麪斤及騾馬民夫搶殺罄盡沿途百姓自白水驛至王村一帶殺斃不少該提督當派譚玉龍劉効忠等帶隊馳往援剿該逆望風北竄我軍復由豐臺玉都廟黨原分路追擊殺斃賊四十餘名生擒五名該逆敗退新城二十五日周顯承親率馬步派提標新左營迅字副中營駐紮黨原以斷該逆往來之路二十六日逆回馬榮和等復由新城退走占城川竄越鎮原之小線子屯子鎮一帶焚掠該提督復派隊赴荔家堡截剿並令西峯鎮各營迎頭堵截探聞孫老五卽孫義洪係孫義寶之弟現與楊大娃子馬生厭等各率逆黨占踞固原收拾城防修

劉中丞奏議卷十三

六

整礮臺安放家眷意圖據爲根本穆三占踞炭山赫明堂占踞沙木溝孫義洪旋將投誠立功之張寶龍殺害與馬雲和合併共圖大舉該提督與譚玉龍等駐涇各軍已至十七營之多糧餉兩缺而雷正綰駐平之軍尙賴該提督設法運糧接濟慶陽糧臺所發餉銀僅截至上年四月止帳房軍火亦俱缺乏實難支持等情具稟前來查逆回孫義洪等竄擾平涇搶劫糧餉雖經周顯承派兵擊退惟該逆黨羽旣眾詭譎異常現旣占踞固原城池密布營壘勢必伺隙狂竄自在意中雷正綰旣有悔悟之誠何以仍聽雷恆李高啟等相與勾結如實係力不能制卽當急圖自拔與慶防之魏添應涇防之周顯承諸軍聲罪致討

庶幾大節昭彰不負

朝廷始終成全之意至雷正綰所部各軍餉項向由慶陽糧臺籌撥嗣值各營兵勇潰逼涇州情形喫緊周顯承等招安十餘營無可贍給臣不得已飭令涇州委員動撥督臣楊岳斌解存涇庫餉銀三萬兩暫資散放並將慶臺在陝屬州縣派捐米糧銀兩項下提撥銀一萬兩委員陳爾弟前赴乾州各處採買麪麥接濟飢軍頃准楊能格來咨已由該臺撥發餉銀一萬八千兩解赴涇州惟涇防營數既多又須日辦麪糧運濟雷正綰平涼各營則餉絀難支自屬實在情形陝省艱窘異常以後但能協濟火藥各項其所需糧餉帳棚實難兼顧相應請

劉中丞奏議卷十三

五

旨敕下楊能格趕緊籌撥餉銀源源接濟一面製造帳房運涇備用以利攻剿除飭周顯承等督率現紮黨原西峯鎮各營認真防堵並飭總兵劉玉興率英毅五營移紮亭口鎮與涇防諸軍聯絡聲勢以資備禦外所有逆回竄擾平涇搶劫糧餉經官軍分路追剿請飭慶臺接濟軍餉緣由理合恭摺由驛具奏伏

乞

皇太后

皇上聖鑒訓示飭遵謹

奏

附密陳叛將情形暫行監禁疏

再臣頃據周顯承稟報叛將胡大貴已由涇州攜眷赴邠臣當密派署中軍副將彭體道拏獲到省督飭司道連日研訊據胡大貴供雷副帥因金積堡敗後撤去幫辦怨憤不平傳集諸將哭訴雷恆立取頂帽擲地摔碎勒令各營開隊聲言誰敢抗違便卽殺誰李高啟倡製大白旗二面上書糧盡餉絕官逼兵變字樣雷恆並函召赫明堂穆三楊大娃子等共相煽亂伊曾勸阻不聽威劫隨行當派雷恆爲頭隊李高啟爲第二隊沈大興爲第三隊伊爲第四隊回目朱懷潮爲第五隊孟義德爲第六隊趨赴涇州伊終覺事體不好心想脫身因於二十一日乘隙私帶所部七百餘人由開城大灣逃赴隆德將情形稟知楊總

劉中丞奏議卷十三

十六

督蒙派秦國勝到隆收撫嗣雷副帥復來檄調伊聞雷恆句通逆回孫義洪等欲來撲營遂移隊至涇州交秦國勝管帶復稟楊總督請假攜眷回南並稱當雷恆等變亂行赴固原之時游擊金占元力相勸阻當被雷恆殺死及其手下勇丁一百餘人固原州官因從馬廠逸出未被戕害迨到平涼各營搶掠餉銀二萬餘兩火藥四五車屬實伊實先受逼脇後自潛逃有平慶涇道平涼府縣各官可證等情臣查胡大貴與雷恆李高啟均係奉

旨拏獲正法之犯再三研鞫該犯堅稱事由雷正綰怨望所激致雷恆李高啟乘機倡亂一面之詞殊難憑信惟既曾自拔赴

隆向督臣楊岳斌投誠復經該督特派秦國勝赴東路一帶察訪情形自必得其真確擬將胡大貴暫行監禁錄供咨候查覆至日由新任撫臣趙長齡覈辦庶冀案無遁情臣復思雷正綰渥受

國恩諒不甘心變節周顯承譚玉龍等舊隸軍麾擢升專闕一旦忘其薦舉之惠無故被以背逆之名情事介在可疑遠道不能懸揣故卽聯捷楊能格同在甘省所奏已有異詞臣亟思挽回大局是以貽書雷正綰曉諭部曲撫輯降回事有爲難不妨自剖昨奉九月二十七日

諭旨該提督本有奏事之責卽可據實入告並以周顯承所招舊部統交調遣仍不得互相抵牾等因仰見我

劉中丞奏議卷十三

十七

皇上洞遠燭微但使能受範圍自可潛消反側惟雷恆李高啟尚在左右固原城池已被逆回占據該提督部伍僅贖十營聞頗爲回眾挾持不能自振而涇州招集馬步已至十六七營之多此以順逆爲詞彼仍猜嫌未釋以後機局之轉移尤賴聖明之操縱管見所及合併密陳伏乞

奏
聖鑒謹

附遵查武關並未撤防疏

再臣現奉十月初四日

諭旨本日據官文等摺內奏稱探聞甘肅潰勇入陝陝軍在寶雞口接仗失利陝省已飛檄武關商南防兵回省堵禦各等情事尚未據劉蓉奏報是否實有其事著劉蓉迅速查明具奏等因欽此查甘肅陶營潰勇一起三千餘眾於八月初間由馬鹿鎮竄赴隴州折趨寶雞縣經臣派總兵劉玉興率師前往堵禦劉玉興旋傳其頭日到營開導願聽招安約於十六日呈繳軍械正在點名之際該潰勇臨時猝變殺傷勇丁百餘名並幫辦之文案戴貴定一員廣集東關旋乘夜遁竄金陵川經劉玉興追至縣頭鎮殲斃百餘名生擒二十餘人該潰勇竄由赤沙渡河圖竄鳳縣復經總兵毛福益率師截擊於姬家坪殲斃三百

劉中丞奏議卷十三

十八

餘名奪獲馬匹器械多件該逆由田家溝狂竄我師追擊於巖灣場復及之於關爺嶺殲除多名該逆復折向縣頭嘴沿山狂走因擊獲賊供有在陝不敢停足圖由興安急竄湖北之語當經臣飛飭駐紮商南武關之劉厚基及興漢兩鎮扼要截擊旋慮其繞由華陽小道逕竄興安復經檄飭總兵蕭德揚毛福益蕭德見會擊於郝家坪沿土壩茅坪鄢家壩等處斬馘數百名擒獲首犯王正明趙達廷等正法其餘二千三百餘名跪地乞降當經分別給資遣散回籍業於八月二十九日十一月二十五日三次奏報在案該督臣官文等所奏寶雞口接仗失利等語自係指此起潰勇而言當時但飭劉厚基就武關扼要截擊並未

調赴省城迫後雷營潰卒逼趨涇州逆回分股繞赴靈州圖由
三水入陝經臣飛調劉厚基武關防軍回紮淳化之通潤鎮堵
剿該軍行抵省城之時靈州情形已鬆旋聞東路捻蹤亦遠是
以暫畱省邊察看東西兩路情形緩急隨時調遣別無飛檄武
關防兵回省堵禦之事該督臣所奏自屬探報之訛所有遵
旨查明具奏緣由謹卽附片陳明伏祈

聖鑒謹

奏

查明張集馨被參各款據實覆奏疏

同治四年十月十三日

奏爲遵

劉中丞奏議卷十三

十九

旨確切訪查張集馨被參各款據實覆奏仰祈

聖鑒事竊臣前奉密寄

上諭前因張集馨奏山陽竄賊逼近商南李雲麟追斬無多全
軍西行李雲麟所派之守備龍常於石泉一帶地方滋擾逗遛
請旨革職並請將統帶礮船得力之周有全暫署陝安道篆等
情先後降旨允准並飭令李雲麟回軍截剿竄匪矣茲據李雲
麟臚陳張集馨居心險詐徇私廢公各款蹟奏參一摺據稱該
京卿攻克山陽血戰二十餘次張集馨則奏稱並未出隊該京
卿之軍入陝後張集馨不給餉需且劄飭各屬不准應付絲毫
於營官則任意劄付撓亂將弁莫知適從張集馨曾受署石泉

令陸塋私惠署陝撫後惟其言是聽陸塋餽賊爲守備龍常所
訐因誣龍常以退守時兵勇滋擾張集馨卽具奏參革並函致
陸塋以快其心周有全曾充長隨因夤緣陸塋得以署理陝安
道李雲麟統軍抵興安時該署知府謝復榮以奉有張集馨嚴
劄不准兵勇入城且云恐有通賊情事致各勇聞而驚疑各等
語李雲麟督軍援陝所需月餉楚省僅供其半張集馨身任封
圻理宜劄飭地方官設法接濟若果如李雲麟所奏則張集馨
有意掣肘不顧大局殊出情理之外惟李雲麟所稱楚軍解體
幾成不測未免意圖聳聽李雲麟於山陽竄賊未能追勦屢奉
嚴旨詰責今乃云非將士之不進實糧餉之不繼是否巧於藉

劉中丞奏議卷十三

三

詞至龍常一員有無逗遛滋擾情事抑係張集馨偏聽誣劾周
有全現已撤陝西道署任其從前有無夤緣陸塋陸塋有無隨
同鄉民餽賊之事張集馨之劄飭所屬不准給餉不准兵勇入
興安府城鈐制李雲麟部下將士究竟是何居心是否屬實著
劉馨按照李雲麟指參各節確切訪查秉公據實覆奏毋稍偏
袒徇隱致有不實不盡陸塋如實有前項款蹟卽著撤任奏參
原摺著鈔給閱看將此密諭知之欽此當卽欽遵密行藩臬兩
司先將石泉縣知縣陸塋撤省一面提集人證會同督糧鹽法
兩道隔別研訊臣於接見官紳隨時畱心諮訪細閱所參五款
多係人所共見共聞之事曷敢豫存成見稍涉偏袒徇隱惟有

督率秉公博採互相參證以昭覈實而免屈抑嗣因案內人等遠在南山且多散處往返提傳致稽時日茲據該司道等審明分晰具詳臣復逐加確切察核如所參嫉能掩功一節原摺內稱該京卿攻克山陽血戰二十餘次親督各營於西河截其歸路賊始敗退此戰夾擊之力地方官民共見共聞張集馨奏謂是日並未出隊等語查李雲麟收復山陽之時張集馨曾經奏明該京卿督率楚勇並甘肅馬隊會同藍斯明兩路進攻斃賊無算逆勢不支乘夜順河東下當將縣城收復並請

敕下該京卿趕將山陽敗匪殲除卽由興安逕趨石泉力籌堵剿迨後逆匪圖竄商州張集馨始奏李雲麟連日未曾出隊是

劉中丞奏議卷十三

王

張集馨之奏報本分兩次案牘具存昭然可據李雲麟似祇見其後次奏稟遂疑張集馨嫉能掩功原參有因而未得其實又所參不顧大局一節原摺內稱張集馨於該京卿入陝軍火餉糈絕不顧問屢次咨商皆諉於山東河南四川三省協濟札飭興安不准應付絲毫等語查李雲麟原部三千三百人係由湖北給餉惟新募之隴軍正後奇右飛捷親兵及澄漢水師等營所需口糧軍火鄂省力難兼顧當經臣札飭署興安府謝復榮無論何項設法接濟並委員在於興商一帶辦理釐金捐輸俟有成數隨時撥解李雲麟行營以供隴軍澄漢等營月餉之用具摺奏明在案張集馨於李雲麟帶兵前赴山陽之時亦曾

經奏請派員隨營按照米捐章程就地勸捐接濟其札飭興安府不准擅動錢糧應付軍餉係屬通飭之件亦非專指李雲麟一軍而言惟各府縣既奉此札自必不肯通融迨後李雲麟咨商擬設糧臺張集馨以恐滋糜費回覆亦係爲撙節軍儲起見惟李雲麟督軍援陝本有主客之分張集馨既近膜視則屬員之心存觀望李雲麟呼應不靈均屬勢所必至無怪其以不顧大局指捫又所參乖戾謬妄一節原摺內稱張集馨於伊所部援軍不問事機可否凡伊布置無不任意撓亂並不籌商逕札營官以致各營將弁無所適從等語查張集馨於同治二年十月二十八日札飭參將胡文勝守備龍常等所帶健毅澄漢

劉中丞奏議卷十三

三

水師隴軍正後等營均歸周有全統轄調遣維時正值漢郡失守逆勢猖獗之際自係爲厚集兵力嚴扼要隘起見惟軍營既有主將張集馨並未咨商李雲麟抽撥兵勇而逕札營官且有如敢故違立按軍法從事之語則將弁心懷疑慮似乎撓亂事權又所參徇私廢法一節原摺內稱張集馨從前犯罪時受同鄉陸塋私惠故此大署理巡撫刑賞黜陟惟陸塋之言是聽卽於參劾龍常函致陸塋以快其心陸塋曾告安康典史蔡萬清自鳴得意湖北候補知府周有全前充長隨黃綠陸塋進階因得張集馨保畱署理陝安道印務統帶各軍等語訊據陸塋供稱咸豐八年張集馨由甘丁憂回籍過陝伊因同鄉稟見一次

維時伊係候補人員焉有私惠至其署理巡撫伊在石泉並未進省從何干預公事龍常參革係奉批示留告素好之安康典史蔡萬清不過訴明冤忿有何得意周有全督勇克復茶鎮出力左膀帶傷自應據實稟報其署陝安道篆及繞帶各軍此係上司主政並無向伊夤緣情事質之蔡萬清亦稱陸塋致信與伊係在奉批之後別無他故查張集馨從前曾否收受陸塋私惠事無證據李雲麟何由而知周有全克復茶鎮張集馨按功奏獎亦無所用其夤緣惟卷查陸塋夾單密稟屢訐龍常之短又屢稱周有全之能張集馨既據陸塋之稟奏參龍常革職又奏保周有全暫署陝安道篆形跡之間似屬可疑惟周有全委

劉中丞奏議卷十三

三

署陝安道缺並未到任旋經湖廣督臣將其改歸武職應無庸議又所參激變軍心一節原摺內稱該京卿兵抵興安欲將義勝兩營畱守郡城卽據興安府稟接奉張集馨嚴札外來兵勇不准入城等語檢查案檔張集馨此次札飭亦言鑒於漢中城固之失多由兵勇內潰之故但札內有該府何以聽人指揮等語意似專指李雲麟而言查李雲麟入陝以後糧餉軍火既不應手又復不准進城其所布置動遭駁飭辦事實多掣肘之慮其在山陽追賊之時餉項既竭無力採辦各州縣又以未奉省城札飭不肯代籌米糧則該軍之不能進力窮追由於糧餉不繼亦屬實在情形以上各款經臣督飭司道悉心推求採訪輿

論考查案卷或事出有因或實有其事或因疑致誤在張集馨外任最久積習甚深其於軍營辦事艱難情形多不諳悉既已視同隔膜何能期其共濟而李雲麟列款糾參疑忿交加亦頗有言之過甚之處現在張集馨業經革職李雲麟兵勇亦已遣散可否仰懇

天恩均免置議之處恭候

聖裁所有遵

旨確切訪查緣由理合恭摺據實具奏伏乞

皇太后

皇上聖鑒訓示飭遵謹

奏

劉中丞奏議卷十三

五

附查覆陸莖稟許龍常各情疏

再臣前奉

上諭李雲麟另片奏石泉縣知縣陸莖於賊至則獻物以求和賊去則殺人以滅口該京堂派防石泉陸莖不令進城石泉爲李雲麟進兵要路果如所奏則實屬目無法紀關繫匪輕前此龍常與陸莖互揭之案孰虛孰實著劉蓉將此次李雲麟參劾陸莖各情彙入前案一併秉公查辦據實覆奏原片著鈔給閱看等因欽此當經臣札飭藩臬兩司會同督糧鹽法各道提訊案內人證訊據陸莖供稱同治二年正月十七日髮逆竄至石

泉伊率在城紳民團勇嚴防扶遵二逆曾射偽諭入城需索貢物伊與紳民未理該逆在城北角壘牆晝夜鳴鑼擊鼓伊等恐其偷挖地道卽在城內建造木城適有西關謀食之軍犯張百齡由賊營逃回城邊喊救民勇弔進詢賊曾否開挖地道張百齡稱無其事詎二月初一日早地雷暴發震塌城垣十三塚幸賴木城得保無虞勇眾怨恨張百齡語言詭詐疑係奸細將其殺死報作賊礮傷斃維時伊正督飭民勇分擊攻城賊匪無暇親驗遂照民勇所報造入陣亡冊內後經查知因值交卸未及自請檢舉此外有方家寨寨長劉洪文給賊煙土被紳民於平定後稟伊訊實正法至守備龍常奉派兩月始到石泉因城小

劉中丞奏議卷十三

五

被難民住滿又奉張署撫札飭不准外來兵勇進城欲令紮於城外龍常不在城外紮營竟赴池河旋往漢陰均未知會且聞該勇在途滋擾是以稟其逗遛退避鄭有貴先在石泉防城打仗出力曾許賞銀二百兩後因經費不足止給銀四十兩鄭有貴卽告辭回家伊與鄉民實無獻物求和亦無殺人滅口之事並據龍常供稱伊於八月奉李京卿派帶隴軍正後營兵勇前往石泉防守路過興安值曹逆竄擾安康縣境經府畱勦至十月十三日始抵石泉擬在城內駐紮陸堃以曾奉張署撫通札不准外來兵勇進城令伊駐紮城外藥王廟伊因其地無險可恃而池河地屬要隘向爲曹藍諸逆往來之路欲往駐紮陸堃

不允彼此口角爭競次早伊卽帶兵竟往池河旋奉李京卿調赴漢陰均未知會陸莖各自起程至稟陸莖隨同鄉民送賊馬匹袖緞實因在石泉時聽其傳言並無實據又據鄭有貴供稱伊先在石泉防城隨同蕭祿帶勇出城接仗奪獲賊馬三匹未及進城逆賊大股衝來伊將馬丟棄仍被賊逆牽去陸莖見伊打仗出力許賞銀二百兩止給銀四十兩適有軍犯張百齡不言賊挖地道致激眾怒殺斃隨又聽說是送逆賊馬匹袖緞求和殺死滅口議論不一嗣因原籍安康家屬被害告辭回家迨後投効李京卿大營派充哨官曾將風聞人言實向李京卿稟過並非有意誣陷亦無實在憑據該司道等恐有不實不盡復

劉中丞奏議卷十三

王

委接署石泉縣知縣林元薌遍訪紳民僉稱並無賊至獻物求和賊去殺人滅口取其紳民人等甘結加具印結呈齋等情會詳前來臣查龍常鄭有貴係原稟稟許之人今反覆究詰皆供誤聽傳言無據可指是陸莖等並無饋賊之事尚屬可信軍犯張百齡因不實言賊挖地道致激眾怒殺斃現有署縣及眾紳民印甘各結可憑其非致死滅口亦無疑義查陸莖龍常平日辦事均有才能覲面之時兩不相下以致各挾意見因口角而成互訐現經查訊彼此互揭情形兩俱不實案無遁飾應卽擬結此案撤任石泉縣知縣陸莖被參饋賊滅口重情俱無其事卽稟龍常逗遛退避亦出有因其於軍犯張百齡激怒眾勇致

斃造入陣亡冊內亦由民勇所誤非出該員捏報第事後查知雖交卸未及檢舉究屬疏忽相應請

旨將陸堃交部照例議處惟該員係升用同知直隸州知州前在石泉團練堵剿實屬著有微勞經臣奏請

賞加知府銜欽奉

上諭陸堃飭查有案當俟查明覆奏時再行請旨等因欽此茲案已查明可否仰懇

天恩俯准照前請獎勵之處恭候

欽定已革守備龍常所稟陸堃隨同鄉民齊賊委係誤聽傳言其帶勇赴防中途被畱剿賊以及移紮池河調赴漢陰訊無逗

劉中丞奏議卷十三

三七

迺退避縱勇滋擾情事該弁年力正強人亦勇往應請開復守備畱營以觀後效鄭有貴妄指陸堃獻物求和殺人滅口實因傳言致誤尚非有心挾嫌誣害且到案卽據實供明情同自首又在石泉屢次帶勇打仗出力酌照不應重律擬仗八十據供前在安徽軍營出力保舉藍翎把總未奉文札不足爲據應照民人折責發落軍犯張百齡並非被賊轟斃應在陣亡冊內刪除其從賊營逃回不言開挖地道幾至城垣莫保情本可疑已被防城民勇殺死並免查究所有查明定擬緣由理合附片具陳伏乞

皇太后

皇上聖鑒訓示飭遵謹

奏

陝西各路墾荒事宜疏

同治四年十月十三日

奏爲陝西各路墾荒事宜續派司道詳定章程設局督辦以專責成而規久遠恭摺陳仰祈

聖鑒事竊維陝省大難初平生聚爲要善後之法莫急於清查地畝招集流亡而地方之被害較深則辦理之艱難特甚臣前歲督師漢南曾經奏請清查叛產籌辦營田嗣據光祿寺少卿鄭錫瀛前署撫臣張集馨疊次陳奏均經奉

旨飭辦在案臣於上年四月抵任督飭各屬認真經理閱歷既

劉中丞奏議卷十三

三

久利害相權其中窒礙之多端弊實之疊出有不得不斟酌時

勢妥爲變通者查近來諸臣條奏大旨不外設屯招佃兩端如

鄭錫瀛疏陳以田給兵之議果能舉行則多開一處屯田即可

少費一營兵餉誠屬撙節軍儲之長策無如荷戈之士不習耰

鋤驍悍之夫難安畝畝古者諸侯疆域大都不過百里征戍不

越境戰爭不逾時故帶甲卽以赴敵釋械仍可歸田近則南北

奔馳轉鬪或數千里東西征剿歷時至五六年欲行寓兵於農

之法亦已難矣若欲按戶授田使戶出一丁以爲兵則比歲所

稱敢戰之卒大都楚鄂之材故鄉自有生計旣不肯挈家遠徙

而稻田麥地南北殊俗亦自慮遷地弗良勢難相強至於土著

之民向皆不習戰陳欲授田而驅以爲兵固未能驟期得力且值兵燹之後土曠人稀求其負耒而農者尙不可得安有餘夫執爰以充兵者乎漢唐以後屯政之興多在邊徼之地戎務閒暇之時然兵興則屯興兵罷則屯罷雖擅一時之利難爲久遠之謀至於前明屯衛之制乃在干戈既息之後散兵歸農使之漸營家室傳爲世業隨時訓練以建一代之規其效固非歲月可呈而今抑非其時也陝省西同鳳各屬地處腹中旣與邊方有別兵民錯雜易起爭端兼值豫捻甘回時虞竄越東防西勦兵勇方罷於奔命尤未暇釋甲務農此設屯之難行也張集馨招佃認墾以租抵餉之奏欽奉

諭旨與其招佃認墾不如作爲屯田如能作爲旗兵之產尤屬合宜等因欽此旋又疏請於陝西省城招募勁旅三千名按兵授田聽其招佃承種收租代餉誠如

聖諭所奏係爲因時制宜豫籌備禦起見卽

臣

前疏欲仿旗租

之制意亦大略相同而籌畫經年卒亦未能照辦者大凡招佃納租之舉宜於地闢民稠之時今則荒地太多遺黎太少各處流徙來歸之民雖其自有產業尙多拋荒未種安有餘力佃耕若欲招徠鄰省之氓則挈家遷徙所費猥繁而修築廬舍購辦糗糧以及牛馬籽種農器諸項又復倍蓰况夫年豐歲歉不可豫期竭終歲之勤勞或不足償其播種耕耘之費則顧慮已多

卽值豐年所獲優渥而租糧併納之餘爲數亦寡兼之租額既定歲歲輸納縱有贏餘終非永業細民利析錙銖能無較量故墾闢荒地與已耕成熟之業難易懸殊而招徠客民與附近比鄰之家情形迥別今地方官出示招募應者寥寥而謂以田給兵卽可以租代餉則亦侈虛談而不徵事實之故矣旗兵生計維艱如能授田作產當可漸冀充饒惟滿營安閒日久不諳農桑旣不肯躬親耒耜如使雇佃承種則所患又復如前自非竟歸荒蕪則或私相典賣故從來給產以贍兵終歸有名而無實况乎官私叢雜稽查不具兵民交涉疑慮尤多此招佃之難行也夫富國莫如盡地力而成務尤在順人心與其急求贍兵存

劉中丞奏議卷十三

三

奢望於屯租而餉糈終歸無著何如寬以待民使樂趨於隴畝而餉源或可自充欲民之樂於墾荒必使知有餘利欲民之有餘利必使得爲世業欲民之得爲世業必先明示限制詳定章程請得縷晰陳之大凡利之所在弊必相隨將開利源先防弊竇其或給產授田之際稍涉含糊胥吏侵漁不免以多報少官司粉飾又或以少報多且叛絕各產與有主之地錯雜毗聯殊難畧劃侵陵隱占均所宜防此時田畝之數不清將來錢糧之數必絀若聽其虧短則中飽太多若督令全完則苛索彌苦此其弊在朦混者也逆回之叛產逃民之絕產其事似不相涉然其中回典漢業回叛而產屬漢民漢典回業漢耕而回已早叛

彼漢民之有契據可驗者固易剖析惟流離之後契據半多遺失鄉鄰又無憑證若不准承認則平民含無告之冤若概與通融則奸民有假冒之弊至於絕產一事或漢典漢業而原主逃亡或漢佃漢業而僅存佃戶甚或原主尙存婦孺有契據而不能指認佃戶雖能指認而又無契據花名冊籍無可稽查戚族里鄰多歸淪喪遂有察知業戶已絕託言契據遺失妄指他人田地爲已業者甚或囑託親舊彼此互相指證莫可究詰種種情形不勝枚舉此其弊在影射者也荒閒之地其鄰近村莊人煙亦必稀少不得不廣招鄰封遠境之民一體領種乃土民念其親舊旣絕不忍以遺業遽屬他人不許客民耕種或詭稱親

劉中丞奏議卷十三

三

舊在外希圖宕延而客民又恐土著欺陵往往相約成羣應募而至若令雜居耦處則平昔氣誼不洽難驟聯以同溝共井之情若聽其結隊分羣則彼此門戶先成尤難期以講讓型仁之誼此時之布置未能帖然異日之鬪爭將成巨案此又弊在土客不安者也臣嘗謂以拋閒之曠土養待食之流民不惟安集可期亦且糗糧易足及觀窒礙之多端弊竇之百出有非尋常意料所能及智慮所能周者然事關民瘼法期經久旣不敢蹈廢弛因循之習尤不敢存欲速見小之心前此疊經揀派司道大員設立營田總局令其檢查舊卷體察情形詳定章程由臣悉心酌核飭屬遵辦其中區畫之要約有數端一曰正經畀仁

政以經界爲先而經界以丈量爲準陝省田地肥瘠不一科則未均其有主之地積久相仍未便紛紛丈量致滋擾累至於叛絕各產欲使賦役得平爭訟不起民獲各安其本業吏無格外之誅求惟有清丈地畝之一法現飭畫分段落編立字號凡客民之應募而來者清查來歷由局給予執照載明畝數多少錢糧若干以防詭混授田必限定數俾絕兼并包攬之萌給領必依次序期杜揀擇攙越之弊認墾既有先後編戶無分主客每十家設一甲長百戶擇一里長使相統率以任完納租糧均派徭役之責而平其爭訟申以條約則客民不得擅立村寨而土著不致倚眾相陵矣一曰定限制叛產絕產畀限先爲劃清叛

劉中丞奏議卷十二

三

產概令入官絕產分別有無當佃轉轄同族親丁以及契據存亡查明分晰核辦其業主之流徙來歸者自該地方被擾之日起算定以三年流離不返卽行截止其客民之招種認墾者自發給執照之日起算定以六年租糧及額卽爲永業規制既定則官司既有遵循民情不至惶惑矣一曰緩錢糧領佃之初闢地開荒牛具籽種棚舍芻糧在在需費且經營於隔歲之前而得食在半年以後歲收之豐歉難必而催科之迫促相隨臣嘗飭同州府勸借牛種民有慮其無力完交畏不敢領者有旣領而救死旦夕坐食無餘者困苦之情深堪憫惻恭查雍正六年上諭安西沙州等處招民屯墾原爲惠養邊民之計今從民戶

到齊之日計算至辛亥之年乃例當輸租之期但小民甫經安插公私兼顧爲難著寬期二年於癸丑升科俾民力寬裕俯仰有資欽此仰見

聖恩廣被在遠不遺今關中爲西北形勝之區值頻年兵燹之後我

皇上如天之仁出水火而登衽席疊奉

特旨蠲減錢糧撫卹周至此次籌辦墾荒仍擬仰求

恩施凡客民所墾荒田俟承種一年之後酌量情形再行升科庶使新墾之民感

朝廷逾格之施無公私兼顧之慮實於招墾事宜大有裨益一

劉中丞奏議卷十三

三

曰定租穀招墾地畝固以綏輯遺黎亦以借資軍食一年之內正供尙須蠲緩自難更議取租惟此項叛絕各產旣已歸官卽與民田有閒現議章程擬於正糧升科之後分別水田旱地科則高下每年每畝薄取租穀以補倉廩之不足六年之後免交租穀祇輸正糧準其作爲世業在小民分年輸納爲數甚微而各路兵食紛繁亦資小補况六年卽行截止並非永遠加徵揆諸民情自必樂於從事凡此數端皆就陝省現在情形妥籌辦法不敢固執己見亦不敢曲徇人情不敢急圖近功亦不敢祇安簡便惟有督飭司道勤求民隱期於弊可豫杜功在必行其或情形互異不能不稍爲變通者再由該司道等會同商酌詳

請新任撫臣隨時奏咨庶於

國計民生兩有所裨用副

聖主軫念殘疆綏輯遺黎之至意抑臣猶有慮者西同鳳三府地居腹裏附近省城向來民風儉嗇而樸厚馴良最稱易治今土著編戶子遺無幾而招徠新集之眾來自遠方大都河南之陝汝湖北之鄖襄四川之巴南通等處爲多民氣雜揉良莠相半則風俗亦將爲一變矣士民之與客民旣慮難於相安卽客民與客民亦慮各不相協處置未盡其宜不特獄訟滋多亦恐鬪競成習惟於編成里甲之後修明鄉約設立義學以禮讓型其父兄以詩書澤其子弟地方官復不時親臨而勸率之務使

劉中丞奏議卷十三

三

涵濡

聖化比戶成風此其因勢利導潛移默化之功蓋有存於法令條告之外者其效固未可期諸期月之間而規畫設施要在還定安集之始早計豫圖若待其風會旣成始爲挽救轉移之計則已後矣事有似緩而實急者故爲我

皇上卒陳之至臣所懇新墾荒田俟承種一年之後斟酌情形再行升科之處如蒙

俞允卽當刊刻謄黃遍行曉諭俾遠近之民感沐

皇仁樂於趨事除將現辦章程咨送軍機處備查外所有續派

司道大員籌辦墾荒事宜緣由理合恭摺具奏伏乞

皇太后

皇上聖鑒訓示施行謹

奏

附遵 旨稍緩起程疏

再臣頃奉十月初二日

上諭劉蓉患病請俟趙長齡到陝後交卸就醫現在甘省逆回叛勇紛紛潰竄陝省邊防緊要劉蓉所部各營必須有得力統將嚴明約束足保無虞劉蓉方可卸責所有布置情形及一切應辦事宜著劉蓉與趙長齡悉心會商務期諸臻妥協方准起程不得急圖交卸致有貽誤等因欽此仰見我

劉中丞奏議卷十三

三五

皇上眷念陝疆審慎周詳之意

臣雖愚闇敢不仰體

宸衷勉竭愚慮查雷營潰變弁勇經周顯承等收撫八九千人但不激壞事機尚可徐規後效惟逆回股數尚多如孫義洪赫明堂穆三馬雲和任老五馬生厭楊大娃子諸逆酋均係陝回現在分踞平涼固原環縣靈州一帶無日不蓄狡逞之謀陝省邊防無時可懈臣所派防略陽鳳縣郿長郿州保安靖邊各界之兵約計馬步二十一營而地勢彌互二千餘里尙有要隘未周之處苦於餉項乏竭難爲增竈之謀腹裏空虛每懷潛襲慮要在酌量緩急隨時調度以濟兵力之絀現所派各路將弁才具各有優劣智略難期深遠要在處置適宜用所長而去所

短以盡偏裨之能至於得力統將本難其人就現在各員而論惟漢中鎮總兵蕭慶高樸實老練資力較深各營將官往往係其舊部尚可聯絡眾心而規畫全局控馭諸軍則仍恃撫臣之悉心體察遇事權衡將來恩信相孚自可指揮如意大凡軍營所圖惟名與利臣前因各軍餉精久缺頗慮眾志漸攜是以兩次陳奏請仍川捐舊章幸蒙

皇上諄諭再三照前籌辦但此項可資挹注則士氣自將奮盈措置得宜必無他慮臣南人不習北方水土自入秦中無三日不病者現所患怔忡之證晝輕夜重飲食日減精力愈疲急思就醫楚北冀起沈疴今蒙

寄諭諄諄自應恪遵

劉中丞奏議卷十三

三

宸訓聞趙長齡不日即可抵省臣卸篆後擬再畱住一月與趙長齡悉心會商凡屬陝甘交界之區形勢險夷道路要隘與夫逆回熟竄之路應行嚴備之處以至防邊將領才具短長性情剛柔調度處置之宜緩急策應之要婉曲商畫纖悉備陳計不過一月之後地勢賊情均可瞭然心目屆時臣即遵

旨南還藉息羸病之軀實戴

生成之德所有遵

旨稍緩起程緣由理合附片陳明伏乞

聖鑒謹

奏

劉中丞奏議卷十三

三



劉中丞奏議卷十三終

劉中丞奏議卷十四目錄

保奏攻勦蔡啟各逆出力員弁疏

附請獎曹克忠蕭慶高二員疏

開報援陝各營收支款目疏

附清單

恭報署任日期疏

會奏籌濟甘軍糧食疏

附請飭川省籌辦捐輸疏

附請提山東協餉疏

附請以林壽圖署理藩篆疏

附請催臬司迅赴新任疏

劉中丞奏議卷十四目錄

附請展緩大計疏

附請賞給紳士劉映菁匾疏

附籌解甘軍餉銀軍火數目疏

密陳涇州軍心危疑疏

附請飭據實查辦以服眾心疏

覆奏陝西叛產礙難變賣疏

附請催飭內閣戶部妥速議覆疏

密陳道府考語疏

高一員疏

劉中丞奏議卷十四

湘鄉劉 蓉蓉

保奏攻勦蔡啟各逆出力員弁疏

同治四年十月十三日

奏爲查明官軍攻勦蔡啟各逆疊克堅壘擒斬要逆並收降追殲僞黨甚夥在事出力員弁遵

旨擇尤彙保籲懇

恩施恭摺仰祈

聖鑒事竊臣前奉同治三年九月初五日

上諭劉蓉奏敗匪紛竄階州督軍越境窮追覽奏均悉蔡啟等

逆經蕭慶高等督軍追躡疊獲勝仗擒斬收降匪黨甚眾餘孽

劉中丞奏議卷十四

狂竄階州劉蓉現檄林之望力扼要隘並飭蕭慶高等越境窮

追辦理尙屬認真在事出力員弁俟事竣擇尤彙保候旨施恩

等因欽此旋因穆圖善所部各軍出力員弁先經保

奏請獎渥荷

恩施而臣部各營正在追勦階州喫緊之際不免缺望經臣奏

懇將攻勦蔡啟兩逆追擊出境勞績特作一案保獎俾免向隅

於同治四年二月十一日奉到

批摺議政王軍機大臣奉

旨著照所請准其擇尤保奏毋許冒濫欽此茲據蕭慶高等開

具出力員弁清單請獎前來臣伏查僞武成王蔡逆昌榮著名

狡悍句合髮逆偽啟王梁成富等率黨四萬之眾由鄂省回竄陝疆逼近省城經臣先飭記名提督彭基品等會同副都統金順擊敗於灃河秦渡及追勦於鄠縣潞峪等處屢挫兇鋒逆遂西趨分踞店子頭田峪樓觀臺黑水峪西駱谷一帶臣復會同現任甯夏將軍穆圖善親督湘果英毅雄毅彝字親兵各軍與河州鎮總兵曹克忠所部前後夾擊屢斬要逆偽統領甘潤任蔡信並擒獲逆酋宋先富等多名逆始退出店子頭老巢過河移駐焦家巷馬鹿村說經臺及樓觀東西各堡我軍移營環壘進逼各將士冒暑衝鋒不避矢石連次進攻斬馘悍賊數以萬計先後逼降偽將葉毓廣韋發謨黃義發陳文元陳兆書陳玉林譚金華王洪興王克昌彭學進羅啟發徐昌先李春年蔣洪順任洪興及中旗偽將鄭永和等各夥黨萬餘人連克堅堡擒斬要逆楊必南等甚多迨該逆敗竄南山各軍冒雨疾追翻山越嶺沿途斬馘收降又計七千餘眾該逆喘息未遑拋棄軍械奔逃出陝潛襲階州其時逆黨存者不過四千之眾尋復越境擊勦所有在事出力員弁實非尋常勞績可比自應量予獎敘以示鼓勵謹擇尤覈實開單恭呈

御覽伏懇

天恩俯准給獎飭部註冊以昭激勸惟查湘果右軍各營於克復階州後業經川省裁撤而曹克忠所部各營現在甘省勦辦

同逆相距大遠均未據開單請保前來應俟咨查明確再懇獎敘除將擬保千總以下各弁咨部核獎並將陣亡員弁勇丁照例辦理外所有查明攻勦蔡啟各逆疊克堅壘擒斬要逆並收降追殲偽黨甚夥在事出力員弁請獎緣由理合恭摺具奏伏乞

皇太后

皇上聖鑒訓示謹

奏

附請獎曹克忠蕭慶高二員疏

再記名提督甘肅河州鎮總兵曹克忠一軍於上年五月間經

劉中丞奏議卷十四

三

臣奏明由隴防調赴鳳郿督率英毅彝字各營截賊前竄之路節節逼勦隨與臣等督飭諸軍夾攻蓋屋一帶計與蔡啟各逆先後十餘戰疊破堅壘擒斬要逆收降偽黨多名均經隨時奏報在案該總兵素稱驍勇膽識兼優實屬忠勤卓著又記名儘先提奏提督漢中鎮總兵蕭慶高督率諸軍進止有度實屬謀勇兼裕勤勞倍至惟該二員官職較大應如何獎敘之處非臣所敢擅擬伏候

聖裁至曹克忠所部各營出力員弁已於另摺聲明容俟咨查明確核實擇尤保獎以示鼓勵謹附片陳明伏祈

聖鑒謹

奏

開報援陝各營收支款目疏 同治四年十月十三日

奏為 微臣 統帶援陝各營一切收支款目遵

旨核實分晰開具簡明清單謹請

敕部存案恭摺仰祈

聖鑒事竊 臣 前准戶部咨同治三年七月初十日奉

上諭所有同治三年六月以前各處辦理軍務未經報銷之案

准將收支款目總數分年分起開具簡明清單奏明存案免其

造冊報銷等因欽此仰見

皇太后

劉中丞奏議卷十四

四

皇上洞徹利弊綜核名實之至意伏查 臣 於同治二年八月初

一日奉

命統師援陝當即募選親兵於八月十二日由成都起程其時

四川督臣駱秉章派援漢南之師為湘果中軍七營湘果右軍

七營嚮導四營英字兩營桂字四營果毅兩副營逮 臣 行抵巴

州即聞援軍挫衄漢郡失守之信當即收集部伍重整旂槍並

咨商督臣駱秉章請將敗挫之後不甚得力各軍由 臣 裁撤募

補務及原營之數其月餉口糧亦務符原協之數以期得力而

利攻勦旋准駱秉章咨覆照辦 臣 因將英字前營裁撤改募馬

隊兩起分撥湘果兩軍將英字中營改為英毅中營桂字四營

改爲英毅副中前後左四營其嚮導四營概行裁撤另募五百人爲英毅右營合成英毅六營之數另派統領營官管帶又另募五百人爲長字營另募八百人爲雄毅營旋又咨商駱秉章調撥彝字營前來會勦因改長字營爲彝字副營均經咨川有案其月餉或由川省防剿局逕解各營支放或解由臣隨營糧臺轉發均於川省協餉項下開支由糧臺另案詳請咨歸四川造報其由臣自行添募之親兵五營驍騎營馬隊一起撫標新軍兩營果毅新軍兩營鎮西軍三營湘果新中一營又增募雄毅營一百人及同治三年五月以後撥畱川援之英毅六營彝字正副兩營雄毅兩營湘果中右馬隊兩起共一營應需糧餉

劉中丞奏議卷十四

五

均照楚軍章程由陝餉項下開支通計自同治二年八月十二日起至同治三年六月底止總共收到四川湖南協餉及四川陝甘各項捐輸並動用本省庫款各計庫平銀三十三萬三千一百七十八兩二錢四分二釐九毫六絲九忽由臣隨營糧臺委員四川候補知府蔣若采等經營支發臣復隨時稽核不准稍有浮冒現據該委員等將二年八月十二日起至三年六月底止支發各營正項雜款總共支庫平銀三十三萬三千一百一十九兩五錢一分零五毫三絲七忽遵照戶部奏定章程開單前來臣逐加查核均係實用實銷委無絲毫冒濫除將贍存庫平銀五十八兩七錢三分二釐四毫三絲二忽歸入三年七

月以後由陝省糧臺另案照例造報外謹開具簡明清單恭呈御覽伏祈我

皇上俯賜飭部存案以備稽考所有開單具報援陝各軍收支餉項款目存案緣由理合恭摺具奏伏祈

皇太后

皇上聖鑒訓示飭遵謹

奏

謹將援陝楚軍自同治二年八月十二日起至三年六月底止各營收支餉項款目總數開具簡明清單恭呈

御覽

劉中丞奏議卷十四

六

計開

一收四川解到勸辦陝甘捐輸庫平銀一十七萬一千六百二十九兩七錢二分八釐二毫一絲六忽

一收四川協餉庫平銀二萬五千八百九錢一分二釐九毫三絲三忽

一收湖南協餉庫平銀一萬一千四百三十四兩二錢

一收湖南省局陝甘捐輸庫平銀五千兩

一收陝西藩庫撥到庫平銀二萬三千九百三十四兩五錢六分五釐

一收川陝各項捐項庫平銀十萬一千一百二十兩八錢三分

六釐八毫二絲

總共收庫平銀三十三萬三千一百七十八兩二錢四分二釐九毫六絲九忽

一支撫標親兵全營將弁勇丁二千八百名長夫一千八百名共領庫平餉銀十一萬三千六百三十七兩八錢六分六釐六毫

一支驍騎營馬隊弁勇一百名長夫三十六名共領庫平餉銀三千四百四十五兩八錢六分六釐六毫

一支雄毅營弁勇九百名長夫三百二十四名內弁勇八百名長夫二百八十八名同治三年五月以前歸川領餉造報自五月初一日起撥支陝餉共領庫平銀一萬八百八十六兩六錢

六分六釐

劉中丞奏議卷十四

七

一支英毅六營弁勇三千一百名長夫一千一百十六名同治三年五月以前歸川領餉造報自五月初一日起撥支陝餉共領庫平銀三萬五千九十九兩八錢二分六釐六毫

一支湘果中右馬隊兩起共一營弁勇二百名長夫一百八十八名同治三年五月以前歸川領餉造報自五月初一日起撥支陝餉共領庫平餉銀五千六百八十兩

一支湘果新中營弁勇五百名長夫一百八十名共領庫平餉銀三千六百四十二兩一錢四釐六毫六絲六忽

一支彝字正副兩營弁勇一千名藤牌勇五十名長夫三百八

十四名同治三年五月以前歸川領餉造報自五月初一日起撥支陝餉至六月十六日止以後復撥歸川省支餉共領庫平餉銀九千七十七兩五錢九分七釐八毫六絲六忽

一支撫標新軍正副兩營弁勇一千名長夫三百六十名自同治二年十二月初四日招募成軍起至三年四月二十九日裁撤之日止共領庫平餉銀二萬七千二百六十四兩

一支鎮西軍中左右三營弁勇一千五百名長夫五百四十名共領庫平餉銀四萬九千一百三十二兩

一支果毅新軍正副兩營弁勇一千名長夫三百六十名自同治二年十二月初六日招募成軍起至三年三月二十二日裁

劉中丞奏議卷十四

八

撤之日止共領庫平餉銀一萬九千八百八十兩

一支隨營偵探護餉勇役二十名共領口食庫平銀三百七十六兩八錢

一支陝西遣撤知府易佩紳果健營弁勇四千餘名酌給川資同籍共發庫平銀七千七百二十二兩四錢七毫二絲一忽

一支辦理漢南軍務四品京堂李雲麟借撥餉銀庫平二萬一千八百八十四兩一錢六分九釐六毫八絲四忽咨由李雲麟

自行彙案造報

一支鹽糧馬乾書識長夫口食心紅紙張等項共領軍需平銀折實庫平銀三千六百四十三兩二錢一分五釐八毫四絲

一支各營領用藍裕帳房一百六十頂白單帳房一千九百八十頂隨帶鑼鍋什物二千一百四十分共用軍需平銀一萬九千六百五十三兩八錢四分四釐除扣減平一分實發庫平銀一萬九千四百五十七兩三錢五釐五毫六絲

一支號衣旗幟刀矛等項製辦工料價值共銀一千三百一十三兩九錢五分六釐四毫六絲除扣軍需平一分實發庫平銀一千三百兩八錢一分六釐九毫

一支採買戰馬四十八匹連鞍轡繩鐙共用軍需平銀六百八兩四錢除扣減平一分實發庫平銀六百二兩三錢一分六釐一支採辦馬弓六十張戰箭一萬枝裝箭皮筒一百二十箇共

劉中丞奏議卷十四

九

用軍需平銀三百八十四兩七錢二分除扣減平一分實發庫平銀三百八十八兩八錢七分二釐八毫

一支採買令旗令箭耳箭戰鑼戰鼓更鼓粉牌巡籤等項共用軍需平銀十五兩二錢三分除扣減平一分實發庫平銀十五兩七分七釐七毫

總共用庫平銀三十三萬三千一百一十九兩五錢一分五毫三絲七忽

以上通共收庫平銀三十三萬三千一百七十八兩二錢四分二釐九毫六絲九忽

支銷庫平銀三十三萬三千一百十九兩五錢一分五毫三絲

七忽

計餘存庫平銀五十八兩七錢三分二釐四毫三絲二忽歸入
三年七月以後支發餉銀另案造報

恭報署任日期疏

同治四年十一月初五日

奏為恭報

微臣署任日期叩謝

天恩附陳下悃恭摺仰祈

聖鑒事竊臣恭讀同治四年十月二十日內閣奉

上諭劉蓉著仍帶革職留任處分署理陝西巡撫等因欽此同
日並准軍機大臣寄奉

諭旨劉蓉前有回籍修墓之請此次既命署理巡撫即著無庸

劉中丞奏議卷十四

十

給假回籍以專責成劉蓉受朝廷倚畀重恩當益加奮勉於軍
務地方各事宜實心辦理以圖報稱等因欽此

訓詞深切感悚莫名旋准撫臣趙長齡派委西安府知府呂儁
孫署中軍參將彭體道費送關防及

王命旗牌書籍文卷移交前來

臣當即恭設香案望

闕叩頭祇領於十一月初一日接任視事伏念

臣以陋質過荷

殊恩撫茲凋敝之區候逾兩載愧乏安攘之策未展寸長前茲

陳奏失詞愆由自取迺荷

高厚之隆施謂是語言之小過釋肩旬日遽承

寵命重申負疚萬端胥賴

聖恩曲鑒臣何幸膺茲

異數超絕等倫即使項踵盡捐猶慮涓埃無補陝省地曠人稀兵饑餉竭東防豫警西逼回氛無可懈之事機有難寬之責備臣既過蒙

恩遇敢不力疾從公冀稍濟於時艱或仰紓夫

聖慮惟臣所患怔忡之證愈積愈深勉強支持終虞隕越當茲邊陲多故警報頻聞緩急機宜變遷靡定卽或精神夙健尙恐思慮難周矧臣病軀何堪重寄再四圖維惟有籲懇

皇上俯念地方緊要迅簡賢員來陝接任俾臣暫息仔肩籍資調理沐

鴻恩於再造何敢自外

劉中丞奏議卷十四

十一

生成顧羸病之久嬰實懼弗克負荷謹陳愚悃仰達

宸聰所有微臣署任日期理合恭摺叩謝

天恩並附陳下情伏乞

皇太后

皇上聖鑒訓示謹

奏

會奏籌濟甘軍糧食疏

同治四年十一月初五日

奏爲遵

旨籌撥倉穀勸捐麥糧暫濟甘軍目前之急仍通籌以後採運

接濟之法請

旨飭辦恭摺會奏仰祈

聖鑒事竊照同治四年十月二十日准兵部火票遞到軍機大臣字寄同治四年十月十五日奉

上諭甘省糧餉缺乏朝廷早深廛念茲覽楊岳斌所奏各營至以麩水充飢情形至此殊為可憫陝西本年秋收既尚豐稔即著劉蓉按照楊岳斌摺內所請各情體察該省上中二等州縣設法捐辦麥糧運至甘省源源接濟並著於邠乾鳳翔邠州各屬先提倉穀四萬石運交秦州涇州慶陽等處俟該省捐有成數再行歸款四川之保甯一郡毗連階州運糧較近著崇實駱

劉中丞奏議卷十四

十三

秉章於該府所屬籌米糧一萬石運赴階州以資軍食該將軍等當力顧全局迅速籌解不得稍有推諉楊岳斌摺著鈔給閱看等因欽此維時臣長齡業已接篆當即會同臣蓉恭錄行知

軍需局趕緊籌議去後茲據該局司道會詳本年閏五月間奉旨飭撥倉糧二萬石運赴慶陽糧臺當即詳明在於附近甘省之甘泉膚施二縣倉穀內如數湊撥由慶陽糧臺自備運脚提解一面通飭西同鳳延榆邠乾鄜綏等府州縣會同慶臺及雷營委員勸捐本色麥糧或改折麥價解往接濟現據西安屬之涇陽三原同州屬之韓邠澄朝等縣稟報麥價銀兩捐有成數已飭催齊趕解慶陽又穆將軍前奏由延鄜各屬採辦軍糧比

因北山瘠苦額徵錢糧無多當由省城糧臺發銀五千兩派員解至延鄜買糧解甘是慶臺及穆營皆可稍資接濟惟楊總督與曹營所部各軍飢困異常自應遵撥倉糧以救眉急無如陝省鄰甘各州縣軍興以來各路援師以及招募勇丁過境口糧均係動支倉儲以致大半告罄刻下邠州長武鄜州保安定邊等處分軍擇要防堵俱應按日碾磨食糧支用已虞匱缺今奉撥四萬石爲數較多勢難照撥第甘省需糧孔急不得不於無可設法之中竭力籌畫擬飭令寶雞岐山扶風長武三水儘撥倉麥料豆共京斗二萬石分解秦州涇州交納聽候提用所需運費卽在轉運局收存各省協甘餉銀項下酌發派員解赴寶雞等縣會同地方官僱備車騾兼程轉運俾免延誤一面體察上中二等州縣開列糧數分委幹員會勸紳糧以濟軍食惟陝省兵燹之後民氣未蘇勸捐非易咨俟辦有成數另行具報等情會詳請

劉中丞奏議卷十四

七

奏前來_臣等伏查陝省各州縣倉糧經逆回蹂躪之後所存實屬無多迨多隆阿率師援秦日碾倉穀運濟嗣值甘省各營募勇過境並各路防軍撥支碾食之糧皆取諸此所屬實就罄竭間有倉底贖存餘糧又皆多年陳久霉變不復可食本年秋季較稔糧價稍平亦因人民稀少食齒不多之故比經訪查各鄉上戶收糧多者不過三千石中下各戶以次遞降或一二十石

至數石不等所入已微而食者亦寡故覺稍有贏餘非真有比
戶豐饒之象也比經穆圖善雷正綰楊能格先後派員勸捐至
再至三已覺筋疲力盡即更委員勸捐所獲究必無多然而督
臣所部及曹克忠各營飢窘至於此極臣等目擊情形斷無坐
視不顧之理現雖竭力湊撥倉穀二萬石不過權濟燃眉之急
即委員分路勸捐亦終屬望梅止渴之事臣等再三籌商惟有
別籌巨款以供採買轉運之資庶幾事歸實際可爲源源接濟
之長策現計鄰甘省分惟晉蜀較爲完富擬請由該二省每月
協濟援甘餉銀二萬兩由陝省分派道府大員設一局於漢中
採買米粟運解秦州設一局於鳳翔採買麥糧運解涇州由臣

劉中丞奏議卷十四

十四

蓉督飭省城司道共總其成仍再籌他省協款使每月約可十
萬之數以厚資本而資周轉庶幾隴軍可免譁潰之虞甘境尙
有肅清之望臣等極知四川山西均爲協餉所困漸有自顧不
暇之勢爲該兩省皆與甘境毘聯誼難膜視使甘事壞則不獨
陝不能支即晉蜀亦決無倖全之理噬臍將及能無豫防所議
山西月協之二萬金容俟臣長齡抵晉撫任後察看情形竭力
籌辦源源解陝以顧大局其四川月協二萬之數相應籲懇
天恩敕下成都將軍兼署四川督臣崇實四川督臣駱秉章督
飭藩司從五年正月爲始如數按月協撥以供採買轉運之資
實於甘省危局有裨除仍督飭司道委員分路勸捐以濟急需

外所有遵

旨籌撥倉穀勸捐麥糧暫濟甘軍目前之急仍通籌以後採運接濟事宜謹合詞恭摺由驛馳奏伏祈

皇太后

皇上聖鑒訓示飭遵謹

奏

附請飭川省籌辦捐輸疏

再臣蓉前因甘軍窘乏殊常曾經兩次陳奏請將毛震壽前在川省籌捐款項三十萬之數照舊舉辦源源解濟欽奉

諭旨所奏自係實情目前甘省軍情緊急更甚於前崇實駱秉

劉中丞奏議卷十四

十五

章等務當力爲其難仍飭令藩司會同毛震壽將原籌捐款催齊陸續解甘以支危局趙長齡已簡陝撫於甘省餉需誼應兼顧著與崇實駱秉章悉心籌畫崇實駱秉章等尤當於民間剴切曉諭務使民生軍餉兩無所妨方爲至善等因欽此欽奉之下仰見我

皇上眷念西陲訓示周詳之至意維時臣長齡業已起程在途

當卽恭錄咨請兼署督臣崇實督臣駱秉章照舊舉辦並行知川局司道及各屬道府欽遵辦理在案茲據毛震壽十月十一日來稟稱該員因思回籍葬親曾經稟請將經手捐務歸併四川舊設陝甘捐局接辦業於十月初三日將各項空白執照實

收分晰造冊移交總理陝甘捐局川東道吳鎬接收以冀事權
歸一諸臻踴躍嗣據吳鎬聲稱服官於蜀而代鄰省籌捐迄未
奉四川督憲札飭誠恐呼應不靈諸多窒礙未便遽行接辦等
語查甘省需餉甚急若復再事稽延於捐務既毫無裨益於餉
需卽大有關礙惟有仰懇咨明四川總督札飭司道接辦以專
責成等情稟請前來臣等竊思崇實駱秉章夙矢公忠必不忍
置甘省危局於不顧况疊奉

諭旨諄諄自應欽遵辦理刻值甯夏軍情緊急各營將士號寒
啼飢日有譁潰之慮每接穆圖善等咨函及該營來陝將弁傳
述該軍飢窘情形深爲酸惻長齡非身至秦中亦不知甘軍

劉中丞奏議卷十四

共

窮苦情狀竟至如此之極而陝庫奇絀不堪言喻合無籲懇

皇上天恩敕下崇實駱秉章迅卽檄飭藩司江忠濬川東道吳
鎬等會同毛震壽速按舊章籌辦源源解濟俾免決裂之虞實

維

高厚之賜除由臣等婉曲咨請兼署督臣崇實督臣駱秉章迅
速札飭籌辦外謹復合詞附片陳明伏祈

皇太后

皇上聖鑒飭遵謹

奏

附催提山東協餉疏

再臣前因邊報緊急陝庫奇窮曾經奏請山東舊欠協陝餉項先解十萬兩以濟要需欽奉

諭旨飭遵在案現經山東撫臣閻敬銘派員解到銀一萬兩雖亦藉資點綴惟時值歲暮天寒各路防邊將士艱窘萬分日來紛索欠餉絡繹道途而甘省曹克忠一軍忍飢苦戰遂解鞏昌之圍不得已湊撥銀二萬四千兩拯其飢乏其陶茂林原部欠解之餉現又欽奉

諭旨飭撥義不容緩本省防軍日虞譁譟近聞派防定邊之副將段登雲一軍已有投戈散去者雖經追斬數人尙不爲止司庫奇窘毫無入款可恃束手仰屋不知所以爲卒歲之謀因聞

劉中丞奏議卷十四

十七

山東庫儲頗號充裕現委知府銜卽補同知直隸州陸莖知府用候補直隸州知州唐德埉兩員前赴山東守提前項協餉銀九萬兩分作兩批趕於年前提到以資散給而固軍心伏祈我皇上敕下山東撫臣閻敬銘卽飭藩司丁葆楨如數籌撥勿復諉延庶陝軍可期安固而甘軍亦資分潤不勝懇禱之至所有催提山東協餉緣由理合附片陳明伏祈

聖鑒飭遵謹

奏

附請以林壽圖署理藩篆疏

再降調藩司林壽圖現奉

諭旨著來京另候簡用欽此查林壽圖從前降調缺當經奏請以督糧道劉齊銜署理其所辦督臣楊岳斌軍營轉運事宜亦經臣奏派試用道岳雲溪接辦在案茲岳雲溪以故鄉墳墓猝被黃河衝塌請假回籍修理而時值嚴冬餉需奇絀兵勇迫於飢寒時虞譁諫陝省糧臺事務本較繁劇劉齊銜向以糧道總辦糧臺現在極力支撐亦難兼理藩篆而臣以病軀復膺艱鉅若非得人贊助亦恐隕越貽羞又甘省製造軍火運解餉需等事向因經費支絀並未另設專局現又欽奉

諭旨臣在陝籌辦米糧秦隴唇齒相依既不能不趕籌接濟而事屬創始地處奇窮採買既艱轉輸尤爲不易其中應行撙節及

劉中丞奏議卷十四

十一

斟酌情形移緩就急之處必須歸併藩司通盤籌畫一手經理方臻妥協自非精明廉幹熟悉情形之員難期得力查林壽圖在陝兩年遇事整飭不避怨嫌清操毅氣堪勝巨任一切要件均能綜理裕如現因母老天寒卸篆後尙未起程合無仰懇天恩可否俯准暫畱林壽圖署理陝西布政使篆務並令督辦陝甘督臣軍營轉運事宜俟新任藩司鍾秀到任再行飭令遵旨進京聽候

簡用之處伏候

聖裁臣爲地方緊要臂助需人起見謹附片具

奏伏乞

皇太后

皇上聖鑒飭遵謹

奏

附請催臬司迅赴新任疏

再陝省禍亂甫平瘡傷未起不獨鄰警頻聞須籌戰守而民氣凋殘吏治窳惰欲除積習以培元氣必須藩臬兩司均能公正廉明方足以資治理臣夙聞新授陝西按察使胡肇智清靜有守孤介不阿該員由福建道員升補斯缺爲日已久尚未聞起程信息恐因海道遼遠別致滯濡現在陝省地方較閩省尤爲緊要合無籲懇

劉中丞奏議卷十四

十九

天恩飭催胡肇智速赴新任俾臣得收指臂之助理合附片陳

明伏祈

聖鑒謹

奏

附請展緩大計疏

再陝省本年

大計甫於十月十九日經前撫臣趙長齡接准部咨尚未轉行

卽值卸事移交到臣

伏查三載考績係屬激揚

鉅典向由巡撫率同藩臬兩司將道府以下各官考察賢否實蹟分別舉錯現在兩司印務均係道員署理同在應行考劾之

列合無仰懇

天恩俯准將此次

大計展緩至來年春間俟新任藩臬兩司如有一員到任屆滿三月再爲舉行庶黜陟咸可酌商辦理益昭詳慎臣仍畱心訪察貪劣不職之員隨時據實糾參不敢稍涉因循寬假所有計典懇請展緩緣由理合附片陳

奏是否有當伏乞

聖鑒訓示飭遵謹

奏

附請賞給紳士劉映菁匾疏

劉中丞奏議卷十四

三

再陝省自被髮回各逆滋擾以後田地荒蕪民生艱窘急須及時墾種無如情形凋敝倉庫空虛當經省城司道設立訓農總局籌款借給咸甯長安兩縣窮黎牛種以資耕作此外州縣飭令各就地方勸導詳經前署撫臣張集馨奏奉

諭旨允准在案旋有三原縣富紳劉映菁捐出銀二萬兩爲該縣散給牛種籽粒之資並因出逃難民及陣亡團勇家屬人等聞賑歸來不敷散放續捐銀四千兩均經該縣前任余賡陽督率局紳核實散給並未假手吏胥貧民多沾實惠由現署知縣唐正恩查係民捐民辦例不報銷稟經藩司覆核詳請

奏獎前來臣查三原縣兵燹之餘民多困苦該紳劉映菁獨力

捐銀二萬四千兩作為牛種籽粒賑恤之資實屬好義急公查
劉映菁先捐道銜

賞戴花翎嗣於咸豐元年經其胞姪光祿寺署正劉賡瀛捐請
二品

封典職銜業已無可復加可否仰懇

天恩賞給匾額以示寵異而資觀感理合附片陳明伏乞
聖鑒訓示飭遵謹

奏

附籌解甘軍餉銀軍火數目疏

再臣疊奉

劉中丞奏議卷十四

三

諭旨籌撥甘肅軍需雖值窘乏萬分不敢稍存膜視業將同治
四年八月分撥解過援甘各營餉銀軍火等項數目附

奏在案茲據軍需局司道詳開同治四年九月分共解支過援

甘各營餉銀二萬七千六百零四兩一錢八分六釐火藥一萬

二千斤火繩一萬五千丈鉛丸六千斤次號銅火箭五十枝大

紙火箭五百枝火蛋三百箇斬馬刀三百把白布單大帳房四

十架竹噴筒一百箇鳥鎗一百桿馬鎗五十桿馬刀一百五十

把戰弓五十張撒袋五十副銅弓勒子五十副戰箭一千枝竹

桿透甲錐各五十莖均經分別委解給領取有迴文為據臣覆

查無異除仍飭該司道等竭力籌措源源接濟外所有陝省同

治四年九月分解支過援甘各營餉銀軍火等項數目謹繕清單恭呈

御覽理合附片陳明伏祈

聖鑒謹

奏

密陳涇州軍心危疑疏

同治四年十二月二十二日

奏爲涇州軍心危疑恐激事變據實密陳仰祈

聖鑒事竊

臣

於十二月十八日接譚玉龍據涇州各營將弁勇

丁僉詞稟訴前次全軍東退實由雷恆李高啟執持雷正綰令

箭逼勒拔營刀砍頂帽綱打營官逼令同叛金占元力諫不從

劉中丞奏議卷十四

三

卽被雷恆殺害并殺兵勇一百八十名勒令拔發該勇等共知

大義難安已多鬩散雷恆等知會回逆隨後趕來傳至平涼整

軍再進隨傳令先割髮辮共扯反旗直破西安各營哨祇得帶

隊繞越拋棄軍械逃到涇州會同整備城守此時情形眾所共

見乃臬司楊能格不聲明叛將之罪轉以各營係因雷正綰撤

去幫辦保舉絕望及以久缺糧餉相率謀變等詞誘咎兵勇現

在萬口紛騰眾心渙散大患卽在目前等語同日又據稟稱該

提督經督臣楊岳斌委以統領捷字馬步等營正在力籌整頓

忽接慶陽糧臺六百里插翼照會逼令全歸雷正綰統帶各營

以雷正綰方與逆回勾結不肯更入叛黨眾心惶惑疑慮莫知

適從楊臬司並欲將駐守荔家堡西峯鎮要隘之軍擅行撤調於東路大局殊有關繫稟請飭遵等情前來臣查雷正綰率師赴甘各營將士素隸軍麾曾經薦舉從征日久雖值糧餉匱乏尙未離心自雷正綰失職怏怏口出怨望之言雷恆等倡始爲非而士心始貳然初猶涕泣勸阻冀其保其令名繼因逼脅殘殺始忍棄其主將舍私恩而急公義出萬死以圖一生蓋賴我國家漸摩之澤人人至深故賤卒亦識尊親臨難能分順逆遂藉涇州守禦之力暫釋

宵旰西顧之憂雷正綰自知眾心已去公論不容始自悔悟痛哭有拌死報効之語

劉中丞奏議卷十四

五

聖恩寬大亦旣准予自新仍令率師勦賊而雷正綰郵書哀懇到處干求由是異論紛紜變幻百出昔聯捷曾以雷軍激變入告矣卽楊能格亦稱固原兵勇潰變慶涇情形危急請將雷正綰所部歸魏添應統帶矣楊能格又奏稱幸得周顯承鎮靜防堵將何成蛟等拏獲正法各營勇始各畏威折回並貽書周顯承稱其力保涇州撥亂反正厥功甚偉矣旋復爲雷正綰請復幫辦更授兵權又稱因周顯承把持糧餉致潰軍紛至涇州索糧此其前後矛盾難逃

聖明洞鑒之中然使雷正綰果能感憤尙可重整軍威招撫部曲卽亦何必深求今叛將抗匿不交仍縱雷恆馬隊結連回酋

擾亂城鄉任聽李高啟步隊將平固兩屬村鎮堡寨攻燬殆盡
陝甘大道梗塞不通猶復日修私怨多起釁端是否悔罪反正
趙長齡在陝查辦諒能詳察前後情形剖白是非據實具奏不
至顛預遷就顧慮瞻徇更貽陝甘大局之患惟事有不得不據
實直陳者臣頗聞雷正綰自知聲名已裂士卒不附而叛將雷
恆李高啟又復礙難交出屢挽聯捷成祿楊能格德興阿代奏
或出關効力或赴楚豫剿擒蓋無可解免於甘省猶冀掌握其
兵符楊能格心慮雷正綰一離甘省則糧臺無所附麗無復專
摺奏事之權不肯代爲陳情且自管理糧臺祇顧慶防各軍不
恤涇州士卒屢因涇營請撥糧餉積啟猜嫌現雷正綰所贖馬

劉中丞奏議卷十四

五

步不過千餘慶陽魏添應僅祇八營亦多虛伍獨涇州營數最
多慮歸譚玉龍等統帶之後卽應交督臣楊岳斌節制又恐因
糧餉勻撥不公或致糧臺被撤而平日藉口督辦慶防調撥營
伍之私心不能自遂於是不計軍心之向背不顧事勢之順逆
多生枝節專事抵牾必欲使涇防各營逼歸雷正綰統帶此則
大局之可慮者也伏思唐時中興名將首推郭李然郭子儀當
收復兩京之後朝廷釋其兵柄則怡然歸田及奉一紙詔書卽
翩然就道以故當時服其忠誠後世仰其勳烈李光弼素與郭
子儀齊名祇以失志怏怏稍違朝廷節度遂至將士不復稟畏
威望因之少衰蓋君臣大義自在人心雖屬武夫粗材亦共知

名分森然不可干犯此萬古綱常所由維持於不壞者比歲東南用兵幾遍天下驍將武臣擁勁旅握兵權者所在有之然或喪師失律貽誤事機一經

朝廷譴責靡不帖耳懾伏獨雷正綰首冒不韙狡焉思逞而將士皆秉義弗從兵勇或投戈以去此蓋我

皇上德威遐被率土歸心實爲

宗社生靈之大慶今楊能格等祇顧僚友私情竟忘

國家公義始則曲爲掩飾繼則諉過他人罔上行私遂致淆亂黑白置陝甘大局綱常大義於不顧斯實事之不可解者春秋之義人臣無將今雷正綰等以么麼武弁敢犯非常論者以其

曾擁軍麾欲以姑息從事不知

劉中丞奏議卷十四

五

國家紀綱法度在所必行雷正綰罪重罰輕輒敢悍然不服向使各路將帥威望有大於此事權有重如此者相率效尤我

朝廷又將何以處之臣慮涇州各營旣耻雷正綰背逆之名不

甘歸附又忿楊能格誣奏之語相聚驚惶如必逼歸雷正綰統帶不惟激成禍變將貽不測之憂抑慮敗壞紀綱更釀無窮之患燃眉之急噬臍何及旣經譚玉龍據各營紛紛稟訴未敢壅

於

上聞所有涇軍危疑情形理合由驛六百里密封馳

奏伏乞

皇太后

皇上聖鑒訓示飭遵至周顯承已來省城聽候查辦合併聲明

謹奏

附請飭據實查辦以服眾心疏

再_臣前奉

諭旨現在趙長齡計已起程著懍遵前次寄諭將周顯承被楊能格奏參各款有無冤抑逐一查明如何持平辦理之處並著趙長齡會商楊岳斌據實具奏毋稍徇徇等因欽此仰見我皇上審慎周詳之至意現聞趙長齡意圖急赴晉撫之任又因

楊能格續參周顯承在甯州催糧滋擾之案

劉中丞奏議卷十四

三

諭旨至爲嚴切並未提及前參各款情節意欲迅速完結不復查察前後情形與楊岳斌會商妥辦_臣維前次雷軍潰退是否係赴涇州向周顯承索取糧餉抑係雷正綰失職怨望率師東犯實爲此案緊要關鍵現在涇州士卒議論紛騰楊能格多方播弄事變所激關係匪輕相應請

旨敕下趙長齡暫緩赴晉悉心訪察前後確實情形仍會商楊岳斌秉公辦理據實具奏庶期事歸平允厭服眾心實於大局有裨是否有當謹附片陳奏伏祈

聖鑒謹

奏

覆奏陝西叛產礙難變賣疏

同治四年十二月二十八日

奏為陝西各屬叛產變賣充餉窒礙難行恭摺縷晰覆奏仰祈聖鑒事竊照同治四年十二月初七日奉到初二日

上諭楊岳斌片奏請將甘肅秦州一帶叛產變賣充餉著即督飭藩司遴派公正員弁認真經理期於兵民兩有裨益毋任胥吏舞弊其陝西各處叛產如何辦理之處著劉蓉迅速妥籌具奏楊岳斌片著鈔給劉蓉閱看等因欽此當即欽遵轉飭營田局司道妥議去後茲據詳稱陝西各處叛產前經籌辦營田係屬限年交租俟六年之後租數交足准其永遠營業為時甚緩

劉中丞奏議卷十四

七

現欲改議變賣如果一律定價可以驟得數十萬金即不必為久遠之謀亦尚可救一時之急匪特甘省增此巨款陝餉亦藉以寬餘惟事須審乎時勢尤必量乎人情利弊兩權輕重自見今縱不豫防異日之弊端亦須真見目前之利益使此時果有懷貲待價之戶收實在之產輸現在之銀自於民軍兩裨若僅憑約略之空言難收確切之實效迨至歲月遷延章程紊亂欲變價而田無可售即欲復限年交租之議而法亦難行此不可不熟籌而豫計者也臣與司道就陝省情形詳察通籌變賣一層有不能行者一有不可行者四請為我皇上縷晰悉陳之陝省殷實之戶向為西同鳳三府較多而受

回逆之害亦惟西同鳳爲最烈蓋因變起倉卒幾於靡有孑遺富民之僅以身免者十之二三略存家貲者更寥寥無幾自本年五月興辦營田當卽通飭郡縣清丈叛產開報畝數頒給章程執照廣爲招募酌量等則准俟一年後每畝按則交租以六年爲限滿限交足者換給契約作爲永業核計租之所值較民間尋常價買不過十分之三而又寬以年限不致迫促並令有力之家不待六年補足租額亦卽准作爲永業乃迄今半年以來各州縣業經丈量報明有案者共計一千九百餘頃而認種者僅九百餘頃此外尙有雜於民產炊煙斷絕無從查辦蓬蒿滿目難以丈量者果能通體售賣就現已丈量地畝計算亦可

劉中丞奏議卷十四

天

值二萬金但議賣甚易而承買實難其人卽如限年交租價值甚賤富商巨賈果有餘力何難照數交足承爲己業無論將來招佃轉售均可獲利居奇乃迄今認種者尙不及半則其無力承買不問可知細詢其故蓋因富厚殷實之家焚掠殆盡其事後逃歸者或婦孺僅存或廬舍蕩燬現方急謀棲身餬口之計家有地百畝者或經營墾種十數畝及三四十畝已覺力有難逮以故荒蕪甚多不暇另圖置產此變賣荒產之所以不能行也至所謂不可行者量地售賣必待富民本省旣已無人則將求之鄰省然富民安土重遷不肯遠離鄉井間有貪取便宜意圖包攬之輩又必合計其往來資斧及牛具籽種棚舍人工

坐食之費然後擇地之肥饒者價之賤薄者度足償其所費而
尚有贏餘方肯認買官欲速售則定價不得不減價減而良田
先售則瘠地之價不得不再減官司曰有減價之議奸民愈存
希冀之心况有力者不能接踵而來歲月耽延拋荒更無人種
其弊一地之肥磽惟里胥糧正知之最悉平時早謀侵吞值此
籌餉維艱亦往往倡爲變產充餉之議謂數萬數十萬不難咄
嗟立辦其實不過欲乘官司急售之時圖遂平日之願所圖既
遂則又必借故展延於是田地日久日荒更無人問何能有濟
要需其弊二軍興以來各路兵差絡繹供支轉運地方官賠墊
不堪其間移緩就急亦有出於不得已者雖屬徵存正款且不

劉中丞奏議卷十四

五

能免其虧挪此項變價之款陸續投收未可限以時日更屬難
於稽查恐將來徒以濟州縣之急未能果濟軍務之急其弊二
地方官不盡可靠胥役保長復與奸民譁張勢必揀派賢員設
局招買計現報有叛產者二十餘州縣不惟無此多員其一切
薪水局費均須就中提取爲時既久所入不敷事必中止彼時
再議招墾則良田已去瘠土猶存農民藉口有詞卽限年交租
之議亦必阻格其弊四有此四弊此陝省變賣荒產之議所以
必不可行今欲以數十萬畝之地遂變爲數十萬金之帑名雖
足以動聽實則無以贍軍不若籌辦營田事雖紆徐然漸次開
墾一二年後錄積寸累實有裨於倉儲六年之間辦理得人成

效要可豫計雖年歲豐歉不一難保無減緩之時而取之既薄所遺亦必不多利弊相權自不如籌辦營田較有實濟等情由營田兩局會詳前來臣查變賣利在富民招墾利在窮民今陝省殷實之家已成貧窶變賣之議不能不資於晉蜀各省而晉蜀富民匪惟安土重遷亦共知此項荒田本屬叛回所管之業今逆回方虜聚隴中日圖回竄是否力能堵禦尙未可知欲令蠲其可以私爲己有之金錢售此不知終屬誰家之荒產而且人地兩不相習利害究難逆睹徘徊觀望顧慮多端故自同治三年以來經署石泉縣知縣陸堃署隴州知州湯敏及舉人權以巽等先後條陳變賣充餉之議迄今竟無應者卽此次辦理

劉中丞奏議卷十四

三

營田招墾納租已逾半年之久而遠方客民願望因循慮致耗其資斧未肯負耒遠來况欲使之先輸地價空持契券此不肯樂從不待再計而決而局詳利弊各端情形均屬將來必然之事與其存變賣充餉之奢望而畫餅不可充飢何如爲招墾納租之緩圖使積粟終能濟乏甘省待餉孔亟但有實效可期何敢竟拘成見第辦法旣多隔閡卽軍餉究無補裨不得不據實縷陳仰邀

宸鑒所有陝省叛產變賣諸多窒礙緣由理合恭摺覆奏伏祈
皇太后

皇上聖鑒訓示飭遵謹

奏

附請催飭內閣戶部安速議覆疏

再臣前奉同治四年十月十九日

上諭劉蓉奏陝西墾荒事宜酌定章程以專責成而規久遠一摺著大學士會同戶部悉心妥議具奏欽此查臣於五月間飭令司道設立營田總局辦理墾荒事宜七月後經該局詳定章程刊發各屬十月後辦有頭緒始行縷悉陳奏旋奉

諭旨飭議迄今已逾兩月是否可照原議章程辦理之處伏祈皇上敕下大學士會同戶部安速議覆請

旨飭遵以便轉飭各屬趕緊籌辦事關地方久遠利弊未可稽

劉中丞奏議卷十四

三

延時日理合附片陳明伏祈

聖鑒謹

奏

密陳道府考語疏

同治四年十二月二十八日

奏為循例密陳道府考語仰祈

聖鑒事竊照司道知府各官例應於年終出具切實考語密

奏一次臣前蒙

恩授陝西巡撫現仍接署篆務每於接見僚屬畱心體察復於

公牘中觀其條列事理並採訪輿論察聽官聲凡不能稱職之

員俱經隨時參劾現在大小各員尚皆克勤厥職其司道暨各

府除藩司係林壽圖署理臬司胡肇智延榆綏道嵩壽均未到任西安府知府呂儁孫業已開缺尙未揀調有員均毋庸出考外所有現任道府等員謹就臣管見所及出具切實考語敬繕清單恭呈御覽伏乞

皇太后

皇上聖鑒謹

奏

